

REGLUGERÐ

um heilbrigðisreglur um framleiðslu, vinnslu, dreifingu og innflutning á afurðum úr dýraríkinu til manneldis.

1. gr.

Gildissvið.

Reglugerð þessi gildir um heilbrigði dýra, sbr. I. viðauka, og gildir um öll stig framleiðslu, vinnslu, dreifingu og innflutning á afurðum úr dýraríkinu og afurðum úr þeim sem ætlaðar eru til neyslu. Reglugerðin gildir þannig um afurðir sem dreift er innan Evrópska efnahagssvæðisins (EES) og fluttar eru inn frá ríkjum utan EES.

2. gr.

Skilgreiningar.

Í þessari reglugerð gilda skilgreiningar í reglugerð Evrópuþingsins og ráðsins (EB) nr. 178/2002 um almennar meginreglur og kröfur samkvæmt lögum um matvæli, um stofnun Matvælaöryggisstofnunar Evrópu og um málsmeðferð vegna öryggis matvæla, sem innleidd var með reglugerð nr. 102/2010 og tilskipun 97/78/EB, sem innleidd var með reglugerð nr. 1044/2011 eftir því sem við á.

Eftirfarandi skilgreiningar skulu jafnframt gilda um:

1. Öll stig framleiðslu, vinnslu og dreifingar: Öll stig frá og með frumframleiðslu á matvælum úr dýraríkinu til og með geymslu, flutningi, sölu eða afhendingu til neytanda.
2. Opinber dýralæknir: Dýralæknir með réttindi til að starfa sem slíkur og tilnefndur af lögbæru yfirvaldi.
3. Afurðir úr dýraríkinu: Afurðir sem eru framleiddar úr dýrum og afurðir framleiddar úr þeim til manneldis, þ.m.t. dýr sem eru lifandi þegar þau eru tilreidd til slíkrar notkunar.

3. gr.

Almennar dýraheilbrigðiskröfur.

Afurðir úr dýraríkinu skulu vera af dýrum sem uppfylla eftirfarandi skilyrði:

- a. Koma ekki frá bújörð, starfsstöð, yfirráðasvæði eða hluta yfirráðasvæðis þar sem eru í gildi dýraheilbrigðistakmarkanir um viðkomandi dýr og afurðir úr þeim, skv. þeim reglum sem settar eru fram í I. viðauka með þessari reglugerð.
- b. Að viðkomandi kjöt og kjötafurðir séu ekki af dýrum sem var slátrað í sláturhúsi þar sem voru dýr, sem höfðu smitast eða grunur lék á að hefðu smitast af einhverjum sjúkdómi sem reglurnar í a-lið gilda um, eða þar sem skrokkar eða hlutar af skrokkum slíkra dýra voru á meðan slátrun eða framleiðsla stóð yfir, nema slíkur grunur hafi verið kveðinn niður.
- c. Eldisdýr í sjó og vatni og afurðir þeirra skulu vera í samræmi við tilskipun 2006/88/EB, sem innleidd var með reglugerð nr. 1254/2008.

4. gr.

Opinbert dýralæknisvottorð.

Afurðum úr dýraríkinu sem ætlaðar eru til manneldis skal fylgja opinbert dýralæknisvottorð, ef ákvæði hafa verið samþykkt um að heilbrigðisvottorð skuli fylgja afurðum úr dýraríkinu frá tilteknu ríki innan Evrópska efnahagssvæðisins, af ástæðum sem varða dýraheilbrigði skv. 9. gr. tilskipunar 89/662/EBE, sem innleidd var með reglugerð nr. 1043/2011.

5. gr.

Innflutningur frá ríkjum utan Evrópska efnahagssvæðisins.

Aðeins er heimilt að flytja inn til landsins afurðir úr dýraríkinu, sem ætlaðar eru til manneldis, ef þær samræmast kröfum 3. gr. um öll stig framleiðslu, vinnslu og dreifingar slíkra afurða innan Evrópska efnahagssvæðisins eða að veitt sé jafngild trygging fyrir heilbrigði dýranna.

6. gr.

Skjöl.

Við innflutning á afurðum úr dýraríkinu frá ríkjum utan Evrópska efnahagssvæðisins skal heilbrigðisvottorð dýralæknis fullnægja kröfum í II. viðauka og skal það fylgja öllum slíkum sendingum.

Með heilbrigðisvottorði dýralæknisins skal staðfesta að afurðir fullnægi kröfum um slíkar afurðir samkvæmt þessari reglugerð og annarri löggjöf þar sem mælt er fyrir um dýraheilbrigðis-kröfur, eða sambærilegar kröfur.

Nánari upplýsinga kann að vera krafist samkvæmt öðrum ákvæðum í löggjöf um lýðheilsu og dýraheilbrigði.

7. gr.

Eftirlitsaðilar.

Matvælastofnun og heilbrigðisnefndir sveitarfélaga undir yfirumsjón Matvælastofnunar fara með eftirlit með því að ákvæðum þessarar reglugerðar sé framfylgt í samræmi við 6. og 22. gr. laga nr. 93/1995 um matvæli, með síðari breytingum.

8. gr.

Brot gegn ákvæðum reglugerðarinnar.

Um brot gegn reglugerð þessari fer skv. XI. kafla laga nr. 93/1995 um matvæli, með síðari breytingum, lögum nr. 54/1990 um innflutning dýra, með síðari breytingum og lögum nr. 25/1993 um dýrasjúkdóma og varnir gegn þeim, með síðari breytingum.

9. gr.

Gildstaka o.fl.

Reglugerð þessi er sett með heimild í lögum nr. 93/1995 um matvæli, með síðari breytingum, lögum nr. 55/1998 um sjávarafurðir, með síðari breytingum, lögum nr. 54/1990 um innflutning dýra, með síðari breytingum og lögum nr. 25/1993 um dýrasjúkdóma og varnir gegn þeim, með síðari breytingum. Við gerð þessarar reglugerðar var höfð hliðsjón af tilskipun ráðsins nr. 2002/99/EB um heilbrigðisreglur um framleiðslu, vinnslu, dreifingu og aðflutning á afurðum úr dýraríkinu til manna. Reglugerð þessi öðlast þegar gildi.

Sjávarútvegs- og landbúnaðarráðuneytinu, 14. júní 2012.

F. h. r.

Sigurgeir Þorgeirsson.

Baldur P. Erlingsson.

I. VIÐAUKI
Sjúkdómar sem taka ber tillit til í viðskiptum með afurðir úr dýraríkinu
og falla undir varnarráðstafanir sem eru gerðar
samkvæmt löggjöf Evrópusambandsins.

SJÚKDÓMUR	TILSKIPUN
Svínapest	Tilskipun ráðsins 2001/89/EB um ráðstafanir Bandalagsins til að hafa eftirlit með svínapest
Afríkusvínapest	Tilskipun ráðsins 2002/60/EB um sérákvæði um eftirlit með afríkusvínapest
Gin- og klaufaveiki	Tilskipun ráðsins 85/511/EBE um ráðstafanir Bandalagsins vegna eftirlits með gin- og klaufaveiki
Fuglainflúensa	Tilskipun ráðsins 92/40/EBE um ráðstafanir Bandalagsins vegna eftirlits með fugla-inflúensu
Newcastle-veiki	Tilskipun ráðsins 92/66/EBE um ráðstafanir Bandalagsins vegna eftirlits með Newcastle-veiki
Nautapest Fjárpest Blöðruveiki í svínum	Tilskipun ráðsins 92/119/EBE um almennar ráðstafanir Bandalagsins vegna eftirlits með tilteknum dýrasjúkdómum og sérstakar ráðstafanir í tengslum við blöðruveiki í svínum
Sjúkdómar í sjávar- og vatnaeldi	Tilskipun ráðsins 91/67/EBE um skilyrði á sviði heilbrigðis dýra sem hafa áhrif á markaðssetningu fiskeldistegunda og -afurða Tilskipun ráðsins 93/53/EBE um lágmarks-ráðstafanir Bandalagsins vegna eftirlits með tilteknum fisksjúkdómum Tilskipun ráðsins 95/70/EB um lágmarks-ráðstafanir Bandalagsins vegna eftirlits með tilteknum sjúkdómum sem herja á samlokur (tvískelja lindýr) með hliðsjón af skrá yfir innlendar tilvísunarrannsóknarstofur í samlokusjúkdómum

II. VIÐAUKI
Meginreglur um útgáfu vottorða.

1. Fulltrúi lögbærs yfirvalds í sendingarríki, sem gefur út vottorð sem á að fylgja sendingu afurða úr dýraríkinu, verður að undirrita vottorðið og sjá til þess að það sé með opinberum stimpli. Þetta á við um hverja örku ef fleiri en ein örku eru í vottorðinu.
2. Vottorðið skal vera á íslensku eða ensku eða því fylgi löggild þýðing á íslensku eða ensku.
3. Frumrit vottorðs verður að fylgja sendingu við flutning til landsins.
4. Vottorð verða að hafa sérstakt kenninúmer. Ef vottorð er samfelld röð blaðsíðna verður númerið að standa á hverri síðu.
5. Gefa verður út vottorð áður en sending, sem það gildir um, hverfur úr umsjá lögbærs yfirvalds í viðkomandi sendingarríki.
6. Vottorð skal vera:
 - a) á einni pappírsörku eða
 - b) á tveimur eða fleiri síðum sem eru hluti af heilli, óskiptanlegri pappírsörku eða
 - c) nokkrum síðum sem eru tölusettar þannig að hver síða er merkt sem tiltekin síða í endanlegri, samfelldri röð (t.d. „síða 2 af 4“).